

Despues di un gira sumamente exitoso na Mexico....

VICENTE TROMP Y SU MARIACHI LIRIOS DEL CAMPO A YEGA ARUBA...

** Ayeranochi despues di un gira sumamente exitoso na Mexico, Vicente Tromp y su excelente grupo di mariachi "LIRIOS DEL CAMPO", a yega Aruba.

DEN AMBIENTE tabata presente na nan yegada na nos Aeropuerto Internacional Reina Beatrix, y por a constata cu e grupo a yega hopi cansa pero sumamente satisfecho for di Mexico. Tambe tabata presente e conocida animadora Chaparita di e programa di musica ranchera na Top 95 Fm.

E gira aki por ser concidera como uno sumamente fructifero pa tanto Vicente Tromp y su mariachi Lirios del Campo, como pa nos pais turistico Aruba, ya cu e acohiba cu nan a sa di conquista na Mexico a capta

hopi atencion di tanto prensa skirbi, radio-emisoranan y tambe algun entrevistanan di gran valor realiza na e prestigioso canalnan di television CNN y Televisa.

Esaki sigur a pone nos tur aki na Aruba sinti nos mes sumamente orgulloso, apreciando Vicente Tromp promoviendo nos dushi isla turistico Aruba ariba canalnan mundialmente renombra.

Pa otro siman DEN AMBIENTE lo bin cu un amplio cobertura di e super exitoso gira di Vicente Tromp y su grupo di mariachi Lirios del Campo, kendenan tabata nos embahadornan cu a representa nos dushi pais dignamente na Mexico...



C.D. DI VICENTE Y LOS PIMENTOSOS TITULO "COBRADO" A YEGA ARUBA



** Manera DEN AMBIENTE a relata siman pasa cu e disco compacto di Vicente y Los Pimentosos un dia pa otro lo yega Aruba, esaki tabata e caso tambe.

Tabata diasabra cu DEN AMBIENTE a ricibi e disco compacto aki durante e pro-

grama farandulero na Radio Galactica. E disco compacto ta hiba e titulo di "Cobrado", cual alaves ta e pieza cu ta priminti di bay bira e hit grandi.

Ariba e disco compacto ta aparece ocho cancion cual e prome ta e tumba "Co-

brado", canta y compone pa Vicente Kelly. E demasnan cu ta sigui ta; Los Agricultores un merengue canta pa Willy Polanco; Rosalbita un salsa canta pa Vicente Kelly; Jovinita un merengue canta pa Willy Polanco; Adios Amor un tumba canta pa Vicente Kelly y compone pa Gregorio v/d Linden; Arubanita un wals di e gran musico Rufo Wever (q.e.p.d.); Homenaje na Ranchera un corrido canta pa Vicente Kelly; Aroyito Cristalino un merengue canta pa Willy Polanco.

Durante un entrevista cu Vicente Kelly, e director musical-acordeonista y cantante, a declara cu e interes pa e disco compacto ta hopi grandi, pero lamentablemente e prome lote tabata limita y a bay manera pan cayente. E segundo lote ta ser spera otro siman adelante.

Tambe Vicente Kelly ta sumamente satisfecho cu e gran acohiba di su hit "Cobrado", cual ya caba ta zonando barbaro ariba nos radio-emisoranan.

Por a compronde cu Vicente Kelly a sali for di

Hospital, pero ariba recomendacion di su medico, e tin cu tuma algun siman mas di descanso. Asina pues cu ketu bay Los Pimentosos ta ariba vacacion.

DEN AMBIENTE ta desea

Vicente y Los Pimentosos hopi exito cu nan tremendo disco compacto nobo y ta recomiende pa e corda PAGA e dokter mas liher cu ta posibel, prome cu e dokter manda COBRA....

MUY PRONTO E PROME FESTIVAL DI CANTO CASINO...

** Pa prome biaha lo bay tuma lugar den e prestigioso Tropicana showroom di Royal Cabana Casino, un grandioso festival di canto entre e empleadonan di tur Casino.

Den e sector di Casino tin masha hopi talentoso cantantenan. Pero debi na nan compromiso di nan funcion cu ta existi e horarionan di anochi, nan no por a sigui explora nan talento di canto.

E organizadornan ta trahando duro pa realiza e festival aki ariba un nivel nunca vista aki na Aruba. E cantantenan lo bay ser acompaña pa un super orquesta y e premianan lo bay ta algo sumamente atractivo.

Pa grandioso anochi aki lo bay tin presentacion di varios di nos propio popular artistanan local y tambe como invitado especial un artista internacional hopi popular.

E prome festival di canto ta priminti di bay bira algo grandi, mirando e credibilidad y seriedad di e organizacion. E huradonan di e gran anochi aki, lo bay ta un elenco di personahenan respeta den nos comunidad cu sa kiko ta come y bebe di un festival di canto di tal indole.

Keda pendiente pa mas informacion, pa loke ta trata e prome festival di canto entre empleadonan di CASINO...